

Bonjbauq Banh Aen Yizsi Ciemdingh Canghraiz Sawcuengh Geiz Daihngeih

(Bonjbauq siusik gicej Cau Dwzfeih Liengz Cingz)
“Seizcin raejrubrub, bak va nyupnyup hai; song hoih ngamq ciuhai, canghraiz angq ciemdingh. Rumzcin daengz gwnz-biengz, yawj yienghyiengh cungj moq; beixnuengx caez goenghoh, canghraiz doh mbanj raeuz.” Ndwen 3 ngoenz 22, aen yizsi ciemdingh canghraiz Sawcuengh geiz daihngeih bonjbauq youq ndaw sing fwen goksasa neix hainduj lo.

Bi 2018 ndwen 3 ngoenz 23, bonjbauq banh le geiz nduj “aen yizsi ciemdingh canghraiz Sawcuengh”, caeuq Yiz Ciz、Cungh Hihcwngh、Yinj Fuzgen、Luz Yuzgangh、Lingz Siuyangh 5 boux canghraiz Sawcuengh ciemdingh bi ndeu, cingj canghraiz Sawcuengh yungh vahcoj raiz faenzcieng, gyoengqde mbouj-duenh raiz ok faenzcieng ndei, youq 《Gvangjsih Minzcuz Bau》(banj Sawcuengh) fat le 47 geiz 47 aen cienbanj 38 bien faenzcieng, dijcaiz miz sanjvwnz、sawcuenh、fwen, daezcaiz lai, neiyungz gvangq, vih boux gyaenz raiz faenzcieng Sawcuengh guh-ok yienghndei. Doengzseiz, gij faenzcieng ndei 5 boux canghraiz



▲ Bonjbauq cungjbenhciz daiqbiuj bause caeuq canghraiz ciemdingh.

ciemdingh hix hawj gij caetliengh banj Sawcuengh ndaej daezswng, ndaej daengz bouxdoeg haenhndei.

Bi 2019 bause gyahung aen doih ciemdingh, caeuq canghraiz ciemdingh geiz nduj laebdaeb ciemdingh doengzseiz, gyalai bouxraiz Danz Hijvah gig miz dungxcaiz raiz faenzcieng Sawcuengh haenx, gungh ciemdingh 6 vunz, hoeng Luz Yuzgangh aenvih ndangnaiq mbouj ndaej laebdaeb ciemdingh, ndigah ciemdingh geiz daihngeih miz Yiz Ciz、Cungh Hihcwngh、Yinj Fuzgen、Lingz Siuyangh、Danz Hijvah 5

boux.

Ciuq cam rox, Danz Hijvah ngamq gyahaeuj aen doih ciemdingh neix, daj siujyoz hainduj hag Sawcuengh le, caengz gatduenh hag caeuq yungh Sawcuengh gvaq, bi 1999 hainduj yungh Sawcuengh raiz faenzcieng, youq 《Gvangjsih Minzcuz Bau》(banj Sawcuengh) caeuq 《Sam Nyied Sam》fat 《Mwh Mbawraeu Nyumx Nding Bya Baihhaenx》《Yamq Ndeu Byaij Loek Seiqvunz Loek》《Caijsaek Seiqgyaiq Ciengxlwenx》daengj sawcuenh、sanjvwnz Sawcuengh 40 lai bien gvaq.



▲ Aen vienhciengz ciemdingh.



▲ 5 boux canghraiz bineix caeuq bonibaua ciemdingh.



▲ Bouxfwngzriengj cingj mbaet mbawcaz.

Cauhbingz: Mbanjcaz Banh “Cazvuengz” Doxdax

Ndwen 3 ngoenz 19, “dieg mbawcaz mizmingz Cungguek” Hocouh Si Cauhbingz Yen banh “cazvuengz” doxdax bi banh baez haenx, daengx yienh 22 boux bouxak mbaet caz、25 boux saefouh guh caz guh “cazvuengz” doxdax, yungh neix hawj gij caetliengh mbawcaz ndaej daezsang. Cauhbingz Yen dwg dieg guh mbawcaz Guengjsae youqgaenj, bi 2018, daengx yienh ndaem caz najdieg 22.6 fanh moux, bi ndaej mbawcaz hawq 1.26 fanh dun, mbawcaz gyaqcienz dij 14.58 ik maenz, daengx yienh vunzguhnaz dan gai mbawcaz bingzyaenz bouxvunz souhaeuj 3180 maenz.
(Liuz Feih/刘飞)

Gainazlaeuz Namzningz Banh Hozdung Cunz Gai Geiqniemh Hai Gai 300 Bi

Ndwen 3 ngoenz 22 dwg ngoenz geiqniemh Gainazlaeuz Yunghningz Gih Namzningz Si hai gai 300 hopbi, doih foux lungz、doih foux saeceij、doih betyaem、doih gyonghung daengj 10 lai aen doih minzsuz cunz gai heux gai youzbyaij, soengq gij hohfuk seizcin hawj siminz, yinx ndaej geij fanh vunz bae caeuqfaenh.
(Yi Sienghceuz/喻湘泉)



▲ Yienhciengz foux lungz nauhyied dangqmaz.



◀ Doih gyonghung youz gai.